

Lelaki terlibat pertaruhan bola sepak haram didenda RM1,000

KUCHING: Seorang lelaki berusia 32 tahun dijatuhi hukuman denda RM1,000 atau tiga bulan penjara sekiranya gagal membayar oleh Mahkamah Majistret di sini, semalam kerana terlibat dalam kegiatan pertaruhan bola sepak haram.

Majistret Mason Jaro Lenya Barayan menjatuhkan hukuman itu terhadap Eddy Hazizi Zailani selepas dia mengaku bersalah mengikut Seksyen 6 (1) Akta Pertaruhan 1953.

Seksyen itu membawa hukuman denda tidak lebih

RM5,000 atau penjara tidak melebihi enam bulan atau kedua-duanya sekali, jika sabit kesalahan.

Mengikut pertuduhan, Eddy didakwa melakukan kesalahan itu di sebuah premis tidak bernama di Siburan, Jalan Kuching-Serian di sini sekitar jam 7.35 malam pada 15 Jun 2024.

Berdasarkan fakta kes, sepasukan polis yang melakukan Ops Soga X menyerbu premis itu dan menahan Eddy kerana disyaki terlibat dalam kegiatan pertaruhan bola

sepak haram.

Semasa serbuan, polis menemui telefon bimbit, wang tunai RM164 dan sekeping kertas yang disyaki mengandungi pertaruhan bola sepak.

Siasatan kemudian mendapati sekeping kertas itu adalah jadual perlawanan Kejohanan Bola Sepak Eropah UEFA 2024.

Pendakwaan dilakukan oleh Pegawai Pendakwa Inspektor Merylene Lindan Andrew Mang, sementara Eddy tidak diwakili peguam.